

21. apr. 2015

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqqummiuppara:

Utoqqalinersiaqartut qanigisaannik toqusoqartillugu Kalaallit Nunaanni ilisiartornissamut ukiumut ataasiarlutik pisortanit akiliunneqartalernissaat isumageqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Nikolaj Jeremiassen, Siumut)

Inatsisartuni ilaasortaq Nikolaj Jeremiassen Siumut utoqqalinersiallit qanigisaannik toqusoqarsimati-llugu ilisiartorlutik angalanissaanut pisortanit akiliunneqartalernissaat pillugu siunnersuutaanut ima oqaaseqassaagut.

Utoqqaat pillugit politikkitsinni inuup naleqassusia aallaaviuvoq. Tamatumalu ilagaat toqqissisimaneq pitsaassuserlu. Nunatsini utoqqanngorluni inooqataaneq nuannersuusariaqarpoq, taassuma timitalerlugu piviusunngornissaa inuiaqatigiit akisussaaffiini tamani ippoq.

Akisussaaqatigiinnerup iluani susassareqatigiinneq tassaavoq sunut tamanut kivitseqatigiinneq nammaqatigiinnerlu. Ilisimavarput ullutsinni aningaasatigut ilungersunartorsiornerput tamatsinnut qanoq oqimaatsorsiorfiutigisoq, aamma nalunngilarput maannamut killiffipput qanoq unammillernartigisumik tamatsinnut eqquisoq. Taamaattumik Siumumiit oqartariaqarpugut utoqqaat atugaat pitsanngorsassagutsigit akisussaaqatigiinneq annertoq inuiaqatigiit ilutsinni qangaanit pigisarput pilerseqqittariaqaripput, tamatuma pilerseqqinneqarnerata nassatarissavaa periarfissanik aporfilersorpallaarnata siuarsaaqataanissarput.

Maannamut killiffipput qiviaqqaagassatsinni pingaarnarpaat ilagaat. Nalunngilarput ilisimallugulu aningaasaqarnikkut ilungersunartumik inissisimanerput pillugu pingaarnersiulluta tulleriaartumik sulisariaqaratta. Naak ikiuukkusunneq annertoq tamatsinni misigisimagaluarlutigu aningaasaqarnitta maannakkutut inissisimagallartillugu aalajangiitinnata siunnersuutip sunniutissai pillugit misisuilluarnissarput pingaaruteqarpoq, qulaajagassat apeqqutaatillugit anguniagaq tapersernartoq aatsaat eqqortumik akineqarsinnaammat.

Ilumoorpoq utoqqalinersiat ullumikkut atuuttut annertussusaat amerlagisassaangimmata. Naak taakkuugaluartut ukiorpassuarni qasusuillutik sulinerikkut inuiaqatigiinni napatitseqaataasut, utoqqalineranni pitsaasumik atugaqarnissamik tunisariaqaraluartut. Aammali ilisimavarput angallanneq nunatta iluani qanoq akisutigisoq. Utoqqalinersialimmut aki unammilleruminaalluinnartuvoq, taamaattumik pingaaruteqarluinnarpoq aningaasanik toqqortaqaarnikkut sillimmateqartuarnissaq.

Siumumiit kaammattuutigaarput tamatuma inerisaavigineqarnissaa aammalu periarfissarsiuunneqarnissaa.

Taamaattumik immikkoortup aappassaaneerqannginnerani Siumumiit Ataatsimiittaliat susas-
saqartunut ingerlateqqinneqarnissaa innersuupparput.

Laura Táunâjik
Siumut